

欽定大清會典事例

卷

一千一百二十五至
一千一百二十八

八旗都統

兵制

欽定大清會典事例卷一千一百二十五

八旗都統

兵制

合操二

官兵校射

嘉慶六年

諭。從前每年會演八旗都統前鋒統領護軍統領副都統等。惟至會演處投遞職名。並不親見大閱長。後因諾穆親投遞職名。本身未到。經大閱長等查出叅奏。是以擬定每逢會演。各旗都統前鋒統領護軍統領副都統必親見大閱長。但大閱長並非均係親王郡王。都統內亦有兼大閱長者。親王郡王內亦有兼管

都統者。每年會演時。親王郡王大臣等。若俱面見大閱長。與體制不符。著交大閱長等。嗣後會演時。都統前鋒統領護軍統領副都統等。親至會演處。仍照舊例投遞職名。不必親見大閱長。如有僅遞職名。本身不到者。大閱長等查出。即行指名參奏。不可徇情。代為諱飾。○十八年奉

旨。綿億等奏請八旗漢軍操演鳥槍。專用上隊馬甲。共二千四百名。按二十二次操演。著即照所議行。再御槍處官兵技藝。向俱精熟。嗣後八旗漢軍每屆操演之期。著每旗咨取御槍處一人。前往教演。如有施放

不能合格者。令其隨時指撥。俾一律精純。悉成勁旅。本年仍即按期操演。○又奏准。每番操演鳥槍。散給每名鉛彈三十箇。分三次演放。每次演放十出。

○二十一年

諭嗣後每遇進哨。大小臣工。概不准以雨水寒冷為詞。妄生浮議。儻有敢於嘗試。造作浮言。希圖阻止者。必按軍法治罪。○二十二年奏准。在京都統副都統各管營大臣親隨兵二名者。俱定為六班。其餘俱令照常操演。不得因常川跟班。致誤操演。○道

光元年

諭朕恭閱嘉慶五年

皇考仁宗睿皇帝實錄內載國家設兵原以衛民全在平時操練方能得用第承平日久文恬武嬉各營伍將弁往往自耽安逸竟不以操練為事而該管上司又復不加察查以致日漸廢弛著各該督撫提鎮務須隨時認真操練使之技藝嫻習悉成可用之兵以飭營伍而重巡防等因欽此仰見我

皇考聖慮深遠有備無患之至意因思我朝開創之初八旗軍鋒所指無不克敵制勝厥後統一寰區武功耆定外而各省亦俱建立營伍分防駐守鉅法良規

盡美盡善。溯查乾隆年間。西陲用兵。兩金川平定。八旗勁旅。最為得力。人才亦復輩出。此後嘉慶初年。三省教匪滋事。全賴

聖謨廣運。克奏膚功。八旗官兵打仗出力者。固不乏人。究未能全數收其實效。如昔日者也。皆由管領教練之人。平時漠不關心。因循懈怠。坐令國家有用之兵。日就荒廢。深為可惜。更堪憤恨。如健銳火器兩營。操練本屬認真。遇事亦能得力。然近日風氣。亦不逮從前遠甚。至於前鋒護軍諸營。亦非從前可比。而滿蒙漢二十四旗之兵。更難過問矣。雖一切情形。不能與

健銳火器兩營並論。然亦不可藉此推諉。視為具文。甘為廢棄。其東三省官兵。原屬驍健。乃根本之地。更不可稍形荒廢。嗣後該管王大臣等。務須遵照舊規。加意操練。何人某項技藝優長。何人馬上最為嫻熟。全在平日留心分別記憶。或隨時量加鼓勵。或升轉秉公拔擢。總在該管之人不辭勞瘁。公正乃心。方能漸收實效。用復舊規。若不實心經理。經朕看出。或因事顯露。朕惟該管之人是問。毋謂教之不豫也。○八

年

諭國家建立營伍。修明武備。全在平時訓練精熟。方能

得用。惟承平日久。各省駐防綠營將弁。不免自耽安逸。諸多廢弛。各該管大員。果能竭力整頓。隨時認真操練。自能使營務日有起色。著通諭各將軍都統督撫提鎮。於駐防綠旗將弁士卒。督率練習。務期一日有一日之功。一兵有一兵之用。斷不可任其委靡不振。無裨戰守。經此次訓飭之後。儻不痛懲惡習。實心振刷。以致兵力漸形軟弱。經朕覺察。定將該管大員。無論現任歷任。一併從重治罪。決不寬恕。該將軍督撫等身受重恩。其各加意策勵。簡練精嚴。以副朕整飭戎行。諄諄誥誡之至意。並著將此旨。各錄一道。實

貼衙署或教場。俾觸目儆心。日久毋懈。○二十二年諭。兩翼八旗添設槍兵四千名。兩翼四百名。八旗三千六百名。著御前大臣會同前鋒統領護軍統領妥議具奏。欽此。遵。

旨議定。兩翼每挑前鋒二百名。八旗每挑護軍四百五十名。兩翼每派隊長二名。帶隊章京三名。八旗每派隊長二名。帶隊章京六名。烏槍於武備院領取。鉛丸火藥由工部領取。交營散給。新挑之兵。自奏定章程後。每月演放打牌六次。演進步陣勢三次。本年兩翼八旗合操二次。自二十三

年起。於二月七月開操。五月十月止操。共操演
六箇月。每月打牌二次。演陣勢一次。春秋共合
操二次。所有演陣合操。俱不放鉛丸。所有演放
鉛丸火藥火繩。每年按二季行工部領取。如鉛
丸不能合式。由兵丁等自為灌造。報部覈銷。十
營操演鳥槍。在各該營操演馬步箭之處。合操
在安定門外教場內。令該管大臣親往閱看。務
期一律整齊。新添槍兵四千名。於兩翼八旗裁
撤馬乾銀兩。改作公費。至每年不敷銀六百五
十兩。及應添海螺旗幟等項。均由該營餘平銀

兩添辦。○咸豐三年

諭京師重地。各旗營官兵。共計十四萬九千有奇。素稱勁旅。若不勤加訓練。俾技藝日精。何以備千城之選。嗣後該管大臣。於所屬之驍騎護軍前鋒步軍以及圓明園八旗健銳火器各營官兵。務須挑選精壯。實心簡練。雖有看守直班之責者。亦須輪流入操。並擇各該營差使較簡之大臣。常川督率。每月由閱兵大臣分班親閱。使馬步火器一律嚴整。儻各該營官兵。或有技藝生疏老弱充數等弊。一經查出。朕必將該管大臣從重懲處。決不寬貸。懍之勉之。○五年

諭。國家設兵衛民。非平日勤加訓練。不足以資捍禦。京旗各營。尤以練習技藝為本務。自宜亟加整頓。以嚴武備。所有健銳火器圓明園八旗各營。以及前鋒護軍八旗漢軍等營。應行操練兵丁。著該管王大臣認真訓練。務使技藝精熟。毋得有名無實。並著閱兵大臣親往覈實校閱。分別勸懲。其如何定期簡閱之處。著閱兵大臣妥議章程具奏。欽此。遵

旨議定。八旗滿洲蒙古漢軍驍騎營。八旗漢軍槍礮藤牌三營。兩翼前鋒八旗護軍營內火器營。仍照定章。由該旗校閱。其

圓明園八旗健銳營外火器營三項官兵。責成該管王大臣督率章京訓練。每年閱看兩次。春季自開印起五月十六日免操止。秋季七月十六日開操起封印止。按季閱看槍操。演放鉛丸一次。健銳營外火器營。

圓明園八旗均在該營教場內火器營兩翼前鋒營八旗護軍營八旗漢軍均在德勝門搭連坡閱看。○同治元年奏准。向例每年秋季兵部轉行八旗各營官兵。在本旗教場操演二次。又將八旗各營官兵分為四班。於兩黃旗教場各操

演一次。再將八旗各營官兵會集一處。於仰山窪操演一次。現在神機營調取各旗營官兵訓練。並各旗營兵丁兼有派往各路軍營出征者。不敷操演。所有秋季兩旗操演。及仰山窪合操。暫行停止。○同治八年。議定合操章程。嗣後無論城外。及仰山窪合操。各該管旗營王大臣都統副都統。仍遵舊章。先赴教場等候查點本部官兵。豫備督隊操演。至各旗營入隊官兵。除旗纛金鼓八旗漢軍鹿角礮位內火器營子母礮。及隊內執事官兵。先赴教場。各按隊伍排列。

豫備點名操演外。其兩翼前鋒八旗護軍營馬步隊八旗漢軍槍兵。內火器營槍兵。八旗滿蒙箭隊暨新設槍兵。均令該管參領翼長等。由本署整飭隊伍。先期商定時刻。各按旗分次序。督帶出城。不得先後錯亂。俟操演畢。仍稍休息。整隊入城。如官員有空誤者。由各該管大臣報至閱兵大臣。從重叅辦。兵丁有空誤者。由各該旗營查明斥革。臨操錯失者。當時在隊內鞭責儆衆。其管旗營王大臣都統副都統等。除有差不計外。如無故不赴教場。據實奏請嚴譴一。向例

合操。滿洲蒙古旗分及前鋒營應用弓箭。漢軍內火器營應用礮位。藤牌鳥槍。護軍營豫備交衝馬隊。年久廢弛。兵丁困苦。未能隨時脩理器械。嗣後合操。將滿洲蒙古新設槍營弁兵。添入隊內。與漢軍內火器營一體演放進步連環。並將驍騎次隊撥兵數十名。佩帶弓箭。以備演槍。畢。跟隨護軍衝出。吶喊。其餘官兵及護軍二隊翼隊。俱持弓箭。隨同進退。至前鋒營兵本無多。仍照舊例佩帶弓箭操演。並由神機營製辦撒袋九百分。分放八旗滿洲各六十分。八旗蒙古

各四十分。前鋒營左右兩翼各五十分。以便操演佩帶。平時在署妥為收存。每屆五年。由各該旗營行神機營修理。其護軍營馬隊。僅習馳騁。臨敵不足實用。令按照神機營外火器營式樣。演練轉旗連環。每兵各放二槍。再行整隊交衝。以期兵歸實用。一。合操官兵二萬餘員名。覈計每官錢四千文。每兵二千文。所需不過銀四千餘兩。由神機營放餉餘存項下。每年九月間撥銀五千兩。分放各旗營。作為仰山窪合操津貼。其贏餘之銀。即作為新設槍營獎勵之用。每屆